

道光辛卯年鐫

銅山縣志

本衙藏板

續修銅山縣志序

周官小史掌邦國之志外史掌
四方之志爲後世郡縣志所自
昉其官屬皆隸於大司徒是邦
國四方之山川疆域戶口風俗

銅山縣志

皆有版籍存於王朝用以周知
天下之利病此制治之要至於
今不廢者也余前直史館與修
一統志檄取郡縣圖籍以備考
訂而其中因革損益之故往往

未詳蓋自

開國至今二百載郡縣志或百餘
年或數十年未經修輯因而典
章文物近者皆缺有間夫爲政
在乎宜民間俗採風皆關政要

銅山縣志

二

志之不備則俗尙無繇知掌故
無可考嗚呼伊誰之責歟道光
七年秋余奉

命出守江南越三月檄典徐州郡郡
本州治領豐沛蕭碭四縣雍正

十一年始改爲府移淮屬之邳
宿睢隸焉又以州之舊治改設
銅山縣自是隸於府者州縣凡
八余承乏斯土見其民之輕犯
法而命盜案之繁且重也惻然

憫之推求其故蓋繇乎民貧地
瘠其民貧地瘠之故繇乎八邑
皆濱黃河河日高而霖潦無宣
導之路民間土田或不能樹藝
失其業者久矣民貧則無室家

之戀遂易輕生地瘠則多游食之徒因而骫法雖有臯陶之能日事鞭笞不足以移風易俗也竊謂政貴探其本原治徐之道以開水利爲先務水不能歸於

河尙可歸於南之洪澤湖北之運河雖距徐少遠而鑿渠以通之使大小相維脉絡相貫則水有所洩而頻年之水患可去水患去則民業復民業復則皆知

樂其生而懼卽於死勉爲善良而不輕犯法此自然之理也爰請諸大府籌備經費擬擇其水利之尤要者次第興之旣周厯相度復考諸郡志若銅邑之龍山河宿邑之民便河皆已淤廢數載以來昕夕經營旣與吾士民共成之其他類此者不一而足載稽郡志或闕略未備蓋

郡志纂自乾隆五年嗣後無踵
修者今昔殊形多不可考然則
志之不可不修也審矣顧郡志
必以州縣志爲權輿而徐屬各
州縣志皆數十年未修之書也

疎脫舛漏一如郡志無可取証
乃徧告吾僚以修邑志爲當務
之急而山右崔君適來宰銅下
車卽倡俸勸輸以斯役爲已任
閱時月首先告成余擷其書覽

之大河南徙汴泗交會徐值其衝夷險罔定宣防之略宜備而書之志水利也詳地多瘠曠旱澇時告履畝登版戶籍失實出納之經宜訂而書之志賦役也

核其他若天經地緯文事武備人官物產綜理條貫數十年湮替之跡如指諸掌足以繼承前式垂示方來完矣備矣夫銅邑隸徐郡邑宰所有事郡守所有

事也首邑之志成他邑必相顧
踴厲次第以成而郡志之成更
可拭目以俟他日史館採擇信
而有徵然則崔君相助爲理之
功不旣多歟其平時從政之敏

圖治之達並得於修志一事見
之余故樂爲之序道光十年歲
次庚寅十月知江南徐州府事
會稽潘楨書於彭城郡署之逍
遙堂

續修銅山縣志序

志一邑難於治一邑治者治當然循其心之所知悉其力之所至明健吏猶庶幾焉志者志已然立今以指昔修辭不誠其蔽也爲鑿空撫事不精不博其蔽

銅山縣志

一

也爲掛漏爲舛訛故曰志爲難然長民者不依乎志以立治其於治也猶闇也宜稔宜黍之不物何以字氓上丁仲丁之不習何以興學輕典重典之不權何以平獄其他星文亥步人官物

曲一與撫斯邑者如相綴焉如相鏡焉故欲依乎志以立治則輒棄之作正不得以難辭戊子春志元承乏徐州府銅山縣事邑素號望劇肩輿行道周月計率得大半地又爲古彭城郡某

山某水一樓一臺內具史書數萬言顧嘗以道周所見所聞所傳聞者取而證諸志則又疏脫舛午多有不合處蓋地入

國朝雍正十一年始改州爲郡舊隸州境者置銅山縣未有志又

十餘年邑宰張君始成之權輿
俶落之書不能犁然當者勢也
前志成迄今八十餘年未續修
其間沿革湮替不能廉以辨者
又勢也以故甚欲續修之適邑
紳耆亦以志乘放軼曠歷年所

儻及今慙置之踵事者尤難爲
功懇懇然具狀以請並願醵資
佐纂校抄胥剗刷之役焉余嘉
其意之不必謀而合而衆志之
復僉同也乃倡捐歲廉延古杭
左泉金太史總其事並於簿領

少暇時與邑中士矜慎公審以
相成略者詳之遺者補之絕者
繼之誤者訂之疑者闕之閱九
月日而告蕝夫自維輅材復膺
劇地其於一邑之能治與不能
治固未有以自信已尙何敢復

任其所難任者事耶然是志也
成閱者或以爲尙足承前式資
後起不至以則僭則亂則散相
詆譏而因是以諒余之治斯邑
也當亦無大過差而不至於甚
闇焉是則私衷所爲竊幸者爾

道光十年歲次庚寅十月朔知
江南徐州府銅山縣事山右鳳
臺崔志元序

原敘

郡邑之有志也遠之爲百代文獻所由徵而近之爲一方治理所由據徐號古彭城地爲國爲郡爲州代有沿革

本朝自雍正十年以其地爲南北要津遂升州爲府其舊隸州境者爲銅山縣迄今歷十有餘年而銅山有縣無志甚闕典也夫徐之有志舊矣然今之徐府也轄邑且八昔之徐州也轄邑亦四若以舊之州志爲縣志母乃雜而越且夫銅縣也義不得與直隸州混必也就本邑之蹟斟酌損益纂舊訂新而後乃釐然

銅山縣志

卷二十四

原敘

一

成爲一縣之書是役也烏容以已或者謂州之舊志大半皆銅之事餘數邑之事無幾焉況乎銅之城邑猶是徐之城邑也銅之山川猶是徐之山川也銅之人物風土農桑學校與夫河渠水利戶口賦役之事一切因乎徐也凡舊志所載除豐沛蕭碭四邑所分屬而外皆徐也卽皆銅也烏睹州志之無當於縣志哉而不知否否蓋自古郡邑之有志非徒以備觀風者輶軒之採亦非徒以供博涉者蒐攬之資凡欲使司治理者守一郡則悉知一郡之事宰一邑則悉知一邑之事故必舉所治中自東至西自南至北四境

之疆隅與其間數千年因革廢置之宜數萬姓休養生全之利輯成一帙不漏不支俾展卷瞭如者身不下堂階而是中之土俗民情若燭照而數計也若駟馬之駕輕車而就熟路也若慈母之保抱其赤子而取懷以爲予也夫然後可以勉勉於循良之治而無憾今宏運而亟於銅志是講者誠懼湮邑乘兼恐墮官守也府志已成而縣無專志奚可哉先是舊令王君琮申詳各憲已蒙允行而旋去前人有美愈不得不續而成之也憶曩任甘泉甘亦新分邑志之纂成亦出鄙手茲於銅邑志倣而行焉旣以備將來之採

擇或者於治理不無小補云肯

乾隆十年歲次乙丑七月望日文林郎知江南徐州府銅山縣事江夏張宏運序

銅山縣志

凡例

一 大清一統志體大思精邁越千古允爲郡邑志圭臬但一邑之紀體有大小其例不得不稍爲變通固未嘗倖規而錯架也閱者諒諸

一 府志創始於政府後視前諸志獨爲簡核舊邑志仍府州志爲之其間多有抄襲舛誤者朝代遺脫年月錯亂蓋比比焉茲俱爲參考訂正

一 志先畧野以地理上應天文也而疆域之廣輪建

銅山縣志凡例

一 邑之沿革與夫形勢之強弱風俗之醇駁城池山川之控禦一皆治斯地者所宜詳也至都鄙鄉鎮墩堡橋梁驛遞等又與城池山川相表裏者胥爲附載

一 黃河自宋時奪汴而南徐之被患滋劇

國朝數百年間雖泛濫不免而當事諸公相機扼要屢致安恬分防設汛之事洵斯土重務也故別爲一冊至天然閘荆山奎山等河或洩漲減黃或歸湖濟運與大河相爲表裏自應附入

一 丁田賦役皆有定額自邑志成後數十年間陞除